



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Opposition-i mapang shidak nung mera agia inyaktsü: Kcharge

Novak Djokovic temekok surgery agiogo

VOL. XXI ISSUE NO. 235 (ADOK 235)

DIMAPUR ROGONÜ (FRIDAY)

AAMI (JUNE) 07, 2024

₹ 5.00

## Chief Secretary-i ajungben rongdak senden ka ayonger

Dimapur, Aami/June 06

(TYO): Doyang Dam Reservoir, NEEPCO temalen jana indokba ajanga lipajen akoksaba/raksaba nungi kumzüksü aser anepalutsü atema asadanga mera tejangja agitsü atema Chief Secretary, Nagaland, J. Alam, IAS ajanga June 7, 2024 anepdang 10:30 ako nung Chief Secretary, Civil Secretariat, indang Conference Hall, Kohima nung ajungben rongdak senden ka ayonger, ta sangdong ka ajanga ashi.

Iba senden nung tsüinglanglen shia aliba Departments nungi AHOds aser HOds tem arua adentsü metetdaksü:

1. The Director General of Police, Nagaland
2. The Principal Chief Conservator of Forest

(PCCF), Department of Environment, Forest & Climate Change

3. The Principal Secretary, PHED

4. The Commissioner, Nagaland

5. The Commissioner & Secretary, Urban Development & Municipal Affairs

6. The Secretary, Department of Water Resources

7. The Commandant General, Home Guards. Civil Defence & SDRF

8. The Director, Urban Development & Municipal Affairs

9. The Deputy Commissioner, Wokha (through VC)

10. The HOP, NEEPCO, Doyang (through VC)

## Nüburi aginüba ama ni meranga inyaktsü: S Supongmeren Jamir

Dimapur, Aami/June 06

(TYO): Tsüingremi temoatsü mulamoshia agütsüba aser Pai tsüingdang ajak takoktsü ta asenok nem maneni angatetdaksüba atema Pa nem tenüngsang agütsür, ta Nagaland nungi 18th Lok Sabha züingsem asütsü shimteta alisang S Supongmeren Jamir-i sangdong ka ajanga ashi.

Nagaland nung aliba nüburtemi lemtetba ni pelaset a ser ajemlaua agizüker aser ni aser Congress party bhukuma vote agütsür asoshi ochi nung ni maneni nokdaksü, ta ashi.

Nanagaland aser tesem balala nungi Congress nung ketdangsurtem aser züingsemtem densema nu yarir aser temulunger ajak, Campaign Committee, volunteers aser kija shia dang nübuyimba mapang ajak nung manokshi bendanga agütsür yariba atema kü temulung taroktiba nungi pelaba lemsateper,

ta Jamir-i ashi.

Iba takok ya asenok ajak indang lir.

Rising People's Party-i tatishitsü tajung sayua akang-akanga lungjemer yariba atema palaka tenüngsang agütsür, ta ashi.

Civil Society, Arogo, Media aser election dak sendakba sorkar ketdangsur temi democratic yimya amshiba nung yaritepba atema pelaba lemsateper, ta pai ashi.

Ano maneni kü den külemi toktepa candidate tem danga kanga pelar aser ni Nagaland aser linük nübur tenzükbawadang nung tetsüing ajemoka aodang nenoki yaritsü teimla lir, ta S Supongmeren Jamir-i ashi.

Asen Parliament telung aser tema nung ni akok tashi nenok tejangraba bener nokdaksü temulungtetba nung lir, ta paisa ashi.

## Taoba MP Tokheho Yepthomi-i NDPP yutsüogo



Tokheho Yepthomi

Kohima, Aami/June 06 (TYO): Nagaland nungi taoba mapang Lok Sabha züingsem, Tokheho Yepthomi-i Nationalist Democratic Progressive Party (NDPP) yutsüogo.

Yepthomi ya Nagaland nung

tang sorkar kumteta aliba NDPP indang primary aser active membership nungi anena liasü.

Tokheho Yepthomi-i NDPP nungi anenba atema kuli kecha agüja mali.

June 4 nü Congress party-i otsü yanglua küm 20 sülen Nagaland nung Lok Sabha menden ka aliba nung takok ngua liasü.

Nagaland Legislative Assembly nung Congress nungi züingsem kata mali, saka par candidate S Supongmeren Jamir-i vote 50,984 agi NDPP-BJP candidate Chumben Murry madak takok ngua liasü.

Supongmeren Jamir-i votes 4,01,951 angu aser Murry-i votes 3,50,967 angu.



Dhansari Zubza (Kohima) Railway project aser Dimapur Railway Station yanglushiba reprangshia jembishinütsü atema Nagaland Angh La Ganesan-i Chief Engineer of Construction, Malingaon aser NFR indang Deputy Chief Engineers pezü den senden ka Raj Bhavan Conference Hall, Kohima nung June 6, 2024 nü mena liasü.

## PM Modi tanangzüktep June 9 nung agitsü akok

New Delhi, Aami/June 06

(Agencies): Kümsük tasembuba atema India ato kilonser inyaktsü asoshi Narendra Modi tanangzüktep agiba sentong ya June 9 nikongdang agitsü akok ta osangtem ajanga ashir.

Iba sentong ya June 8 nü agitsü jembia liasü, saka tangbo Deobar nikongdang 6:00 ako nung agitsü akok ta ashir.

Iba sentong nung Bangladesh Ato Kilonser Sheikh Hasina, Sri Lanka Tir Ranil Wickremesinghe aser Nepal Ato Kilonser Pushpa Kamal Dahal nungi lenirtem arua adentsü, kong tongtipang nisung 8,000 dak tema adentsü imlar.

Danga linüktem nungi tekolakpur mapang asadanger

anogo shimtetsü, ta osang ajanga ashir.

Brehostibar aonung tashinung parnok mapa-mapang jangjaba sülen iba sentong atema anogo aser mapang lemtetsü.

Tongtipang nisungtem Deobar nikongdang pei linüki aotsüsa kumra, sentong ya Deobarnep Rashtrapati Bhawan nung agitsü akok, ta ashi.

Kasa mapang Telugu Desam Party tekolakba, N Chandrababu Naidu ya Andhra Pradesh indang chief minister inyaktsü atema tanangzüktep sentong June 9 nü agitsü aliba June 12 nü agitsü akok, kechiaser pa Modi indang sentong nung adentsü.

New Delhi nung Modi tezüingzüktep agiba nung adenba

sülen Naidu ya arsanga Amarvati bushia mariner, ta TDP odongtar K Pattabhi Ram-i ashi.

TDP tekolakbai pa tanangzüktep agiba sentong nungya BJP lenir aika jaoka lir.

"Pa June 12 nü tanangzüktep agitsü akok. NDA parliamentary party senden atema Chandrababu ya June 7 nü Delhi nung alitsü aser June 8 nü tezüingzüktep agiba sentong nung adentsü," ta Pattabhi Ram-i ashi.

Anogo ka lir pa Amaravati-i arutsü aser June 12 nü tanangzüktep agitsü, ta pai ashi.

Jana Sena Party (JSP) chief K Pawan Kalyan, shiba Assembly nung züingsem ka ama tang mezüingbuba shimteta ali, pa Naidu meina New Delhi-i aotsü.

## Election duty nung asür nem teyari shidak agütsütsüla: RPP

Dimapur, Aami/June 06

(TYO): India nung election duty mapang inyakdang IRB personnel asem tia makai asüba atema state sorkari vote azüingba maparen temer anogo 10 tsüingta ex-gratia sen agütsütsü nenshia ashir aser ajungshir, ta Rising People' Party (RPP) ajanga June 6, 2024 nü sangdong ka nung ashi.

ECI ajanga tuyuba ama asür sepai/polling ketdangsur shia sen lakh 15 ya June 14, 2024 tashinung state sorkari

agütsütsüla.

Iba sen ya mapang tatsüka lir central sorkari meyipa agütsütsü. State sorkari sen meindoktsü. Ajisüaka ECI totuyuba nung state senpong nungi state sorkari ex-gratia agütsütsü akok ta shia lir, ta ashi.

Sepai shia sen lakh 15 agütsüba dak alia NDPP-BJP coalition ajanga par sasa ex-gratia agütsütsü asü masüar memetet.

June 14 tashinung iba sen agütsütsü agütsüba den külemi

state sorkari asür kinunger nem mapa agütsütsü ajungshir, ta RPP ajanga ashi.

India nung tzüingsang-mopung kanga tatsük alidak ita aika mapa inyaktsü meteta liaka NDPP-BJP coalition ajanga kechiba nübur dang TA/DA sen 1500 aliba nungi sen 550 kumtsüba indang mesangdonger, ta RPP ajanga asüingdang.

Asen tasü tait jawan tem dang state sorkar nungi telangzüba shidak agütsütsü langa lir, ta sangdong ajangasa ashi.

## PFL ajanga Tizit nungi FFBs ali tenzüko

Kohima, Aami/June 06

(TYO): Tang mezüingbuba Patanjali Foods Ltd (PFL) ajanga Department of Agriculture Nagaland den lungjemer Mon district kübok Tizit nungi oil palm indang Fresh Fruit Bunches (FFBs) meyiba ali tenzüko.

PFL ajanga oil palm indang FFBs meyiba alizük tenzükbaya Deputy General Manager of PFL Tapas Kumjar Tripathi, State Head for PFL Mahesh Pathak, Sub-Divisional Agriculture Officer Tizit Myanthung Patton nungertem lia Joint Director, Agriculture (NMEO-Oil Palm) Z Hukhato Sema-i Agriculture

Department farm Tizit nung Brehostibarnü tenzüksü, ta department sangdong ka ajanga

shi.

Nagaland nung oil palm lu ayirtemi timtem ajuruba angateta taoba 'implementing partners' den FFBs tanaben meyiba alitsü asoshi maparen tenzüka liasü, ta ashi.

Ajisüaka ibaji mapa kuma meinyaktet aser department-i ozüing agi melaba ama company den tesendaktep sala liasü.

State nung aluyimertem aser talisa oil palm lu ayimertem ajungtsü mechi department-i oil palm programmes atema nungtugu company tem den teka amteper inyaktsü telemtetba agia Mon, Mokochung aser Longleng district tem aliba Expression of Interest for Zone 2 ajanga Patanjali Foods Ltd

(PFL) den January 31, 2023 nü MoU ka zülutepa liasü.

Aser MoU nung zülutepba ama Tuli nung nursery ka aser Tizit nung ka PFL ajanga amenoka liasü.

MoU zülutepba mapang plantations tejen tem indang FFBs parnoki meyipa alitsüla ta Department of Agriculture indang Director, M Ben Yanthan-i 'pre-requisite condition' ka company nem agütsüba parnoki mulunga agizük.

Yamaji tanübo state nung asangsang nung Zone 2 nungi Mon district kübok Tizit nungi FFBs mezüingbuba meyipa ali tenzüko aser yamaji maneni inyaka aotsü, ta sangdong ajangasa ashi.



### Dimapur DC-i HOD aser ketdangsürtem dang pelaba lemastep



June 6 nü Dimapur DPDB senden amenba mapang DC Dimapur aser DPDB Dimapur mendenbuba, Dr.Tinojongshi Chang-i o jembiba mapang tangokba noksa nung angur.

**Dimapur, Aami/June 6 (TYO):** Itashia amenba District Planning and Development Board (DPDB) Dimapur senden June 6 nü Dimapur DC conference hall nung menogo.

Deputy Commissioner Dimapur Dr. Tinojongshi Chang, shiba DPDB Dimapur mendenbuba lir pa lenisüba nung iba senden amen aser pai züngsem ajak aser züngsem tasentem sendeni pelashisia agizüka liasü.

Senden DC-i, tawa tembangba Lok Sabha election mapang bendanga agüja inyakba atema HOD aser ketdangsürtem dang kanga pelaba lemsatap. "Nenoki teka amteper inyakba ajanga Dimapur nung Lok Sabha election kanga takok ngua agiogo," ta pai ashi.

Paisa, vote azüngba

inyakyim kecha tetsükdaktsü makai inyakba atema Dimapur atema counting observer-i, Team Dimapur nem tenüngsang agütsüba lemsatapa liasü.

Maneni DC-i, ULB elections yimjung nung kecha tebandang makai sadem sadema agitsü atema ketdangsürtem dang kasa tanüla aser tejangraba nung inyaktsü ajungshiba den ULB atema June 7 nü nungi tenzüka nomination file asütsü, ta nenshia metetdaktsü.

Senden nungsa DC-i, February ita Nagaland Olympics aser Paralympic ayongzüka asayaba mapang HOD temi melungsoa tenla agütsüba atema parnok ajak dang kanga pelaba lemsatap. Iba tenla ajanga Better Dimapur Team-i orphanage atema asayamung ayongzüka

katsüba mapang District Administrator-ia teyari agütsütetogo, ta DC-i ashi.

Senden nung taoba DPDB senden nung jembiba onüktem lepa reprangshi aser house-i Nagaland NGOs Forum züngoksemtsü atema abentsü mulungtepa liasü. Usutomi Union Dimapur, Alashi Foundation Dimapur, Association of Naga Indigenous Games & Sports Dimapur, amala lokti tentettem züngoksemtsü; Dimapur district kübok Arok yimtsüng agizüktsü, Nagaland Film association nungja Nagaland Movies and Broadcasting Industry agi melentsü aser Public College of Commerce nungja Public college Dimapur agi melentsü atema benokba onüktem kanga junga sensak asem, aser sorkari dangi abentsü telemtepa agia liasü.

### S. Supongmeren Jamir-i takok anguba nüngtem MkgDCC-i tenüngsang agütsüba sentong ayonger

**Mokokchung, 6th June (TYO):** Tawa tembangba 18th Lok Sabha election 2024 nung Indian National Congress candidate aser NPCC tir, S. Supongmeren Jamiri takok tulu ngutetba tenüng nung District Congress Committee (DCC), Mokokchung-i ayongzüka tenüngsang agütsüba sentong ka 8th June, 2024 nü 1:00 pm nungi Yimchalu nung amungtsü sentong renema lir, ta DCC Mokokchung sangdong nungsa Mokokchung tir & tongti zülur

(Admin) – Watimongba Aier aser P. Aley nati yokba sangdong ka ajanga metetdaktsü. Anungji, ACCC 10 nungi ketdangpurtem, frontals, NPCC züngsemtem, ex-MLA/ INC candidate/advisors, veterans, senior congress züngsemtem aser well-wishers ajak iba sentong nung pela shishia jaoker ta DCC Mokokchung sangdong nungsa metetdaktsü.

### GHSS Chumoukedima nung science laboratory semzükogo

**Dimapur, Aami/June 6 (TYO):** June 6 nü GHSS Chumoukedima science laboratory semzükba sentong nung Deputy Commissioner, Chumoukedima Abhinav Shivam (IAS) alakteta jaoker liasü. Principal, GHSS, Chumoukedima, Karen Yephthomi-i lokti pela agizükba o jembiba mapang, state-of-the-art infrastructure aser tenüngdakba apparatus aser chemicals tem keter science laboratory amenoktsüba atema DC Chumoukedima S Abhinav Shivam, IAS dang kanga pelaba lemsatap.

school tajungtiba nung kaketshirtem atema science lab ka mali ta asübaji taksüka, ta ashi. Paisa, Principal, Chumoukedima Village Council Chairman, Chumoukedima Town Youth Organisation longjemer science stream amenoktsü akhangba bilemtetshia jembia, saka science lab ka makaba ajanga science stream kaketshirtem kangshia liasü.

Principal-isa, kümtem tsüngda Deputy Commissioner-i school kanga nongita arugo ta ashi. Laisa, nükla tajung aketba lenir ya lokti asoshi tajangzük tulu aser iba mapa tajung ajanga kaketshirtem kanga ajangzüktsü, shirnoki kaketshitsü bushilokyonga aoba mapang iba lab indang resource tem amshitsü, ta ashi.

Principal-i, science stream kaketshir tsürapurtem dang parnok tanurtem atema science lab ka amenoktsütsü tenangzükba agüja liasü. Shivam-i ashiba agi, lokti-i tesayur tajung kati nangzükba nongita yaritsüla, aser science lab amenokja pai aji inyakogo.

Sentong nung o jembiba mapang DC, Abhinav Shivam, IAS-i, kaketshirtem nem kaketshisatsü jenjang tajung agütsüba aser bendanga agüja inyaka tejakdangi aotsü atema ajungshiba asoshi school tesayurtem aser Principal GHSS Chumoukedima, Karen Yephthomi nunger nem tenüngsang agüja liasü.

Principal aser tesayurtem lenisüba nung GHSS, Chumoukedima-i state nem konang tetushi bener arutsüogo. Taküm HSSLC tatidang nung Arts stream kaketshir llamgual A Zeliang top 5 nung liasü. Kasa mapang nung HSSLC 2024 nung tatidang agütsüba kaketshir ajak pass süogo. Maneni Samagra Shiksha-i ayongzükba Nagaland Inter District Choir Competition 2024 nung school-i takok angu aser NISE o Forest Department nati World Environment Day nü district level marathon ayongzükba nunga school mezüngbuba nung liasü.

Temettetsü kaji school nung class A nung 12 tashi nung kaketshir meyrejang ka dak tema züngoksema lir. School ya sorkar school tem rongnung dang masü saka private school tem dena toktepa result tajung bener aruba school ka lir. Shivam-i, district nung sorkar

[8:29 pm, 06/06/2024] NUKSHI TYY: Caption : June 5 nü Wtsu talen Alongkima-i ayongzükba Alongkima nung meremeju sentong ka agiogo. Meremeju sentong ayongzükba agiba mapang züngsemtemi jila merektet aser sentep kima aser lenmang tezülen süngtong temja liasü

### Watsü Mungdangi ayongzükba Changtongya nung Town Council election dak sentakba nung shisalemsa sentong agi.



Changtongya nung Watsü Mungdang, Watsü telen Changtongya aser Changtongya Town Council nung Ward Pezü Women Reservation lemsükja aliba nungi Canditate-tem ajurutepa shisa lemsatapba sentong agir kelen tangokba noksa.

**Mokokchung, June/Aami 06(TYO):** Tanu Watsü Mungdangi ayongzükba Lungwa Watsü Süngki, Changtongya nung Watsü Mungdang, Watsü telen Changtongya aser Changtongya Town Council nung Ward Pezü Women Reservation lemsükja aliba nungi Canditate-tem ajurutepa shisa lemsatapba sentong tajung ka agiogo.

Tanu iba sentong nung Watsü Mungdang Tir Wt.Arenla Lkr-i Tajungshi o jembia aser iba den Taoba Watsü Mungdang Tir

Wt.Supongla Lemtur ajanga ULB dak sentakba nung shisalemsaba mapang agia liasü. Sentong nungsa Canditates-temi parnok nukjidong aser tebilembatem lemsatapba aser Changtongya Town Yimden Chairman aser GB union telok nungia tayongzükba o jembia aser iba sentong Watsü Mungdang Tatong Tir Wt.Asola Ozükum lenisüba nung agia liasü.

Changtongya Town nung ward ajak agi 11 lir aser item rongnung ward 4 Women

Reservation lemsükja lir. Aser item 4 Women Reservation ward 4 nung tetokteperitem yamai alitsü. Electrical Ward nung Wt.Sentisangla aser Wt.Tiamongla na tokteptsü. Sunrise Ward nung Wt.Toshimongla aser Wt.Pursangla Imchen na tokteptsü. Old Medical Ward nung Wt.Rongsemnungla aser Wt.Chubakumla Pongen na tokteptsü aser New Medical Ward nung Wt.S.Talisangla aser Wt.Sademmongla na tokteptsü.

### Yingli College nung World Environment day mungogo

**Dimapur, Aami/June 6 (TYO):** Yingli College nung Dept of Environmental Sciences aser NSS na longjemer June 5 nü alima ajunga den külemi World Environment day ayongzükba mungogo.

agitsü koda tongtibang iba indang lemsatapa liasü.

Iba anogomung omen "Land restoration, desertification and drought resilience" nung ajemdaker Asst Prof. Environmental Sciences Jonathan S. Singsit-i o tatsüka jembia liasü. Pai, süngtonglitong atemtsü aser arem wazüka ayutsü atema maneni jenjang

Vice Principal, Yingli College, Dr. B. Henshet Phom-i, indeginous texts aser laishiba dak ajemdaker alinük wakzüka ayutsü atema sobaliba, scientific aser spiritual significance dak rangloker jembia liasü. Sarasadem mapang tatsüka agiba sülen kaketshirtem aser tesayurtemi süngtong 60 shi temja liasü. Süngtong ya Forest department, Longleng-i agütsüba liasü.



### JD(U)-i Railways, Finance aser Agriculture Ministries akhanger



June 06, 2024 nü New Delhi nung NDA teloktep senden nung Ato kilonser Narendra Modi, BJP Tir J P Nadda, TDP Tir N Chandrababu Naidu, JD(U) Tir Nitish Kumar aser tangartem tangokba noksa nung angur.

**New Delhi, June 06 (Agencies):** Bodhbarnü Ato kilonser Narendra Modi-i NDA teloktep nung aliba party tem nungi lenirtem den senden amenba sülen anogo ka lir osang ka ajanga, JD(U)-i Railways, Finance aser Agriculture Ministries akhanger, ta metetdaksü.

2019 kum Lok Sabha election nung JD(U)-i menden 16 ngua liasü saka parnok nem minister menden ka dang

lemzükja liasü, kechiyong iba kumjibo BJP kijai majority nguteta liasü. Ajisüaka tangbo JD(U)-i menden 12 dang nguaka BJP-i majority mengutetba ajanga JD(U) jenjang kanga junga kumogo.

Ano külen NDA senden nung adenba sülen TDP Tir, Chandrababu Naidu-i, TDP-i NDA teloktep metoktsütsü, ta metetdaksü.

Taküm election nung NDA nung densema aliba party aser

Bihar Chief Minister Nitish Kumar-i aniba JD (U)-i Bihar nung menden 12 nungi takok angu.

JDU aser TDP nati BJP pusemba tezüluba nung agütsüba ajanga dang Centre nung NDA-i sorkar akümtsü.

Ano külen TDP Tir, Chandrababu Naidu-ia Lok Sabha Speaker menden den külemi Cabinet nung kanga tongtibang portfolio kar akhanger, ta osang angazüker.

### LS election nung takok angur shilem 46 anema ken o benoka lir

**New Delhi, Aami/June 06 (Agencies):** Tawa Lok Sabha elections nung takok angurtem shilem 46 anemabo ozüing alema inyakba ken o balala benoka lir aser parnok rongnung nisung ana anemabo tashiyim amshia tetsür raksatsüba ken o benoka lir.

June 4 nü Lok Sabha elections osang sangdongogo; iba election nung Bharatiya Janata Party (BJP)-i aniba National Democratic Alliance (NDA)-i menden 293 nung takok angur aser Congress-i aniba Opposition INDIA teloktepi menden 233 nung takok ngua liasü.

Association of Democratic Reforms (ADR) indang report ka ajanga, tawa Lok Sabha election nung takok angur candidate 543 nungi parnok 251 (shilem 46) anemabo ozüing alema inyakba ken o balala benoka lir aser parnok rongnung nisung 27 bo aitsüogo, ta

metetdaksü. MP 233 (43%)-i parnok sasa parnok anema ken o benoka aliba nangzükogo. 2014 kum MP 185 (34%)-i parnok anema ken o benoka aliba nangzük, 2009 kum MP 162 (30%) aser 2004 kum MP 125 (23%)-i parnok anema ken o benoka aliba nangzükia liasü.

Anungji itemji medemdangra Lok Sabha election nung takok angurtem candidate teimtiba anema ken o benoka alibaji taküm takok angurtem asütsü.

Taküm Lok Sabha election nung takok angur 251 anema ken o benoka aliba nungi parnok 170 anema ken o kanga tamajung benoka lir; item ken otem rongnung tashiyim amshia tetsür raksatsüba, nisung tepsetba, nisung tepsettsü merangba, nisung puer aoba aser tetsürtem anema inyakba ken o balala lir.

Ano takok angur candidate 27-ibo ken o balala nung court-

i parnok aitsüogo, ta nangzük.

Ken o pezübo Indian Penal Code (IPC) nung Arrla 320 kübok nisung tepsetba ken o lir aser ken o 27 bo IPC nung Arrla 307 kübok nisung tepsettsü merangba ken otem lir.

Takok angur candidate 15-i tetsürtem anema inyakba ken otem benoka aliba nangzük, aser iba nungjagi anabo tashiyim amshia tetsür raksatsüba, nisung puer aoba ken o ana aser ken o 43 bo tesempa o jembiba dak sendakba ken otem liasü.

Takok angur candidates aser ken o benoka aliba candidate teimtiba aliba party ji BJP lir. BJP nungi parnok 94 anema ken o benoka lir, Congress nungi 49 aser Samajwadi Party nungi 21 anema ken o benoka lir.

TMC nungia 13 anema ken o benoka lir, DMK nungi 13, TDP nungi 8 aser Shiv Sena nungi pongu anema ken o benoka lir, ta ADR-isa metetdaksü.

### Opposition-i mapang shidak nung mera agia inyaktsü: Kharge

**New Delhi, June 06 (Agencies):** BJP aser NDA teloktep nung aliba party temi sorkar akümtsü atema renema bangzüngba anogo nung opposition-i, nübürtemi aginüba ama BJP sorkar nem yimsü mesüdaksütsü atema opposition-i mapang shidak nung tapet mera agia inyaktsü, ta metetdaksü.

Centre nung BJP sorkar kümsük abensaa (küm 5) alitsü atema BJP-i NDA nung tanga party tem teyari maneni nungdaksü, ajisüaka party kari NDA toktsüra sorkar chireptsü.

Opposition-i, Modi yimsüsüba ya "kijai yimsüsüba" lir, ta aitsür.

Bodhbarnü opposition INDIA teloktep nung lenirtem ghonda ana dak tali senden amen aser iba senden nungji party teimbakati party kar teyari agia sorkar akümtsü süoka jembi, ajisüaka BJP leniba nung NDA teloktep nung party tem longjema aliba agi ibaji tamakoktsü liasü.

Osangbenertem den jembidang Congress Tir, Mallikarjun Kharge-i, "Nübürtemi BJP aser parnok indang tesempa aser ochimashi politics anema telangzüba tim agütsüogo," ta ashi.

Kharge-isa, "Iba telangzüba

ya India linük temzüing pusemba liasü, osettsüset nung jenjang atuba den külemi mapa manguba tebilemstü anema liasü, iba dak alia democracy kümzüksü atema liasü," ta ashi.

Paisa, INDIA teloktepi Modi leniba nung BJP yimsüsüba anema maneni raratsü, ta ashi.

"Nübürtemi aginüba ama BJP sorkar nem yimsü mesüdaksütsü atema onoki mapang tetemsü nung tapet mera agia inyaktsü. Onoki nangzükba onük ajak onoki mamadoki inyaktsü, ibaji onok telemtetba," ta Kharge-i ashi.

Osangbenertem den jembidang Kharge den Sonia Gandhi, Sharad Pawar, Rahul Gandhi, M K Stalin, Akhilesh Yadav, Abhishek Banerjee, Sitaram Yechury, Tejashwi Yadav aser Dipankar Bhattacharya nung densema INDIA teloktep nungi lenirtem aika liasü.

Opposition senden nungji N K Premachandran (RSP), Dipankar Bhattacharya (CPI-ML), Priyanka Gandhi Vadra, AAP nungi Sanjay Singh aser Raghav Chadha na, T R Baalu (DMK), Supriya Sule (NCP), Shiv Sena nungi Arvind Sawant aser Sanjay Raut na, Sitaram Yechuri (CPM) aser CPI nungi D Raja nungera liasü.



June 06, 2024 nü Bhopal nung 'Jal Ganga Samvardhan campaign' kübok ayong merüktetba sentong nung Madhya Pradesh Chief Minister, Mohan Yadav-i shilem agiba noksa nung angur.

### SC-i Himachal Pradesh dang Delhi dangi tzu yokang ta tuyu

**New Delhi, June 06 (Agencies):** Tang Delhi nung alirtem tzu agi kanga anüngba mapang nung Brihostibarnü Supreme Court-i Himachal Pradesh sorkar dang June 7 nü Delhi dangi tzu tali yokang, ta tetuyuba agütsüogo.

Iba jakdang Supreme Court-isa Haryana state danga kecha tenokdangba makai Delhi dangi tzu yokang, ta tuyua liasü.

Iba dak alia Supreme Court-i Delhi sorkar danga, tzu amajok nung melalutsüla aser June 10 tashi nung report tejangja agüjang, ta tuyu.

Supreme Court-i Haryana dang Hathnikund nungi Wazirabad tashi tzu methitemi Delhi dangi yokang, ta tuyu aser Upper Yamuna River Board danga Himachal Pradesh nungi yokba tzu level ji Hathnikund nung asadangan, ta tuyu.

Justices- P K Mishra aser K V Viswanathan nati akümba vacation bench-i, Himachal Pradesh sorkari tzu yoktsü atema kecha mashishir aser tzu tali yoktsü melunga lir, ta metetdaksü.

Tamalen Delhi sorkari Supreme Court dang, Himachal Pradesh-i yokba tzu taliji Delhi dangi yoktsü atema Haryana state nem tetuyuba agütsüdaksüner, ta mepishia liasü.

Iba temepishiba ken o angadangan mapang nung Supreme Court-i, "Himachal Pradesh-i mashishir, anungji parnok dang tzu 137 cusecs yoktsü tuyu. Tzüji Hathnikund barrage atongba sülen Wazirabad ajanga Delhi atongtsü. Himachal Pradesh-i yokba tzu taliji Hathnikund nungi Wazirabad tashi tetsükdaksü makai ayimtsü atema Haryana state-i inyaktsü, koba ajanga kecha tetsükdaksü makai Delhi atongtsü aser yangji alirtemi tzu tajemtsü angutsü," ta metetdaksü.

Ano külen Delhi nung AAP minister Saurabh Bharadwaj-i, "Delhi dangi tzu kwi yoktsüar iba telemtetba ya 1993 kum agia liasü saka kum 30 sülen Delhi nung nütsüing kanga renloker liaka tang tashi tzu telatet kasa dang angur," ta metetdaksü.



June 06, 2024 nü New Delhi nung INDIA teloktep senden nung Samajwadi Party Tir Akhilesh Yadav-i DMK Tir aser Tamil Nadu Chief Minister, MK Stalin ajurudang tangokba noksa nung angur.





## TIR YIMYIM YIMOBILEM (EDITORIAL)

DIMAPUR ROGONÜ, JUNE (AAMI) 07, 2024

### Taküm Lok sabha tajungba asütsü!

**T**akümbo Lok sabha election nung yimen telok ajaki takoker amai dang bilemer, kechiyong yimsü tesüdak BJP teloki aniba National Democratic Alliance (NDA) telongjemi bilemba ama tatar menden 400 tashi mengutetaka Congress teloki aniba I.N.D.I.A telongjem purtemi anguba menden dang nungibo kanga agi teimba ngutetba agi ashiashia tasembuba government akümstsü renemer. Ano, Congress teloki aniba I.N.D.I.A telongjemia government akümstsüsa tatar menden abensaa takok mengutetaka taoba election dang nungibo kanga agia tatar menden teimba anguba agi nümadangdangteta opposition nung mener NDA government anema jembitsü onüksa onük bilema atatar südi. Aji oda, yimten telok tilaba purtem rongnung BJP den adenertem balaka government nung kilonser menden tajung angutsü teimla nung pelateper aser Congress den adenertema memenui parnok asoshia mapang tajung ka arutsü ta teimla nung kecha balaka tezümedangi ataba mapang ka lir. Atangji, NDA teloki government akümstsüsa tatar menden agi peria liaka, tang yabo BJP telok asoshi takok angua meshizük parnoki bilemba aser inyaknuba ajak meinyaktettsü, kechiyong parnok kijai government akümstsüsa tatar menden peria nguteta malinungji, BJP teloki aniba government taküm alitsübjai BJP dak masü la den adener tanga yimten teloktem, talisa, Janata Dal (U) aserTelugu Desam Party teloktem ama dak tuluka keta lir, anungji NDA government ya item teloktem mulungba nung dang aotsüsa akümstsü. Iba jagi Congress teloki aniba teloktemia BJP teloki aniba government ya tangbo tatem tonga oa mangur. Iba teimla nungji tang nungi tenzüker anogo shia Congress teloki aniba yimten teloktem nungi adoker tatartemi NDA government tai pua anidaktsü aser tatar senden nunga ken o tapu balala süoka kanga sashia ashishitepa angur. India ama nübortemi shimba yimten nung jangratemtsü kaji, tatar senden nung nübortemi shimer yokba tatartemi pei lima aser nübortem ajangzükdaksütsü atema yimten onük süoka ken o lemtepa ya asütsü. Aji oda, ken o nung tedangshi aser tsüngrusonga jembir tatartemi tatar senden nung jembibabo linük nung otsü kuma tetshir. Item ama yimten ken o tatar senden nung tsüngrusonga jembiteter rongnung Narendra Modi yaa ka asütsü. Ajisüaka, taküm tatar senden nung jangratemtsükaji Narendra Modi aser pai aniba NDA government nung o jembir tatar tajung aika liaka, parnok dang nungi tajungba jembirtemji Congress teloki aniba I.N.D.I.A telongjem nungang lir. Item rongnungji tangartema dena jangratema angatsüsa jembiba tatarji teburtema ajak ajateta jembitetla Trinamool Congress nungi Mahua Moitra asütsü aser Congress nungi taintem rongnung Shashi Tharoor ama aika lir, saka itemji yutsür lanurtem rongnung Assam nungi Gaurav Gogoi amai Assam asoshi dang masü saka Naga nung nungdakba ken o dena süoka jembidang asen nisung ama jangratema angur. Parnok denji takümbo ano Manipur nungi Congress telok nungi adoksang Angomcha Bimol Akoijam-ia Manipur tensa tia indang nungi tenzüker India lima tia indang tatar senden nung sashia jembitsü imlaa atar. Atangji, Nagaland nungi adoksang Wabong Supongmeren Jamir-ia tamalen Nagaland nungi yoker tatartem dang nungibo shilem tajungba agia jembitsü imlar. Aji oda, state tila nungi süaka tejembi dang jembiteterbo, state tenüng nung jembitsü masü saka Congress telok tenüng nung jembitsü asünungji, tatar senden nung mezümpur süaka Bimol Akoijam aser Supongmeren nungertem asoshia Gogoi nung amaji tatar senden nung jembitsübjai mapang peria angutsü. Item tashitemeteter, tangatet, tedangshi aser tsüngrusonga jembirtemi pei lima aser nübortem tia aser parnok nungdakba indang tatar senden nung jembiba angatsü yongyaa atar.

## OLEMSABANG

### Aor ozü tamapur aser ozü tuluba ta otsü zülutepa ya anentsüla

~ L. Kika Pongener.

(Yashi adok nungi...)

Ano kanga tesungmangtsü kaji...Aor kidong ajungaji tambu dang sura...Tanübusangji shiba asütsü (?) Asen kidongji tangar ajak dang tambu, tuluba aser tulur, nokinketer, temeranger tang liasü...Sensaker kata mali ajak taka-taiter 'Kika Suchir' tang liasü. Surabangla, tangar kidong-jibo ajak asen dang tanübu, tilaba, teküpokba, nokinketer, takar kata mali, ajak sensaker aser yim-pezüc tesa liasü asü...??? Aji oda, kechi kidong sudir suang, kenu takok angutsü aser kenu tamakok angutsü, mapang kar nung takar asütsü, mapang kar nung sensaker asütsü aji alima yimya. Tajunger dakji tamajunga alir aser tamajunger dakji tajunga alir. Anungji tamajung kisung daka rangloker ken o mejembir, mesura tajung kisung daka rangloker mejembir. Asenoki tesuiba putu nung Aor kidong shia otsüji bushidanga ora, tajung inyakba aser takok anguba dang masü, saka tashimait aser tamakok otsü-a lir...Kechiyong shir kidong tekolak/lenir sur yimden/loktiji anir arudir, parnok jagi tajung inyakdang tashimait-a inyaksemtsü. takok anguba sulenji khen-khenbo tamakoka ajurutsü, aji alima yimya. Ajisuaka, kechi kidong sudir suaka, kodanga tekolak/lennir mesudangertem anemabo nungsen aser tamajung jembitsüa makatsü aser konang-naroküm agüja jembitsüa makatsü. Anungji kanga tekümdangtsü kaji, tsürabur lipoklisang meteter shirnoki pei chirnur aser semchisemnur dang pei kidong jakzüka aruba otsü ashir, parnoki otsüji tajung aser takok anguba kisung shir, tashi-mait aser tamakok anguba indangbo meshira, nai ner chirnur/semchi-semnur nem mim mozü tamajung agütsür asütsü, kechiyong nai ner ajunglen asaa tiyazü purapojia ashiba otsü jagi kenu parnok maak-asütsü. Anungji kechi kidong sudir suang, pei jakzüka aruba otsü zülubaji anukla-okola nunger-ia hau ta, shitaka ta shitetsüla aser agizükettsüla. Kechiaser asen otsüji asen sasa aseni shitaka/junger ta züluba jagipo tabensa masütsü. Aor-i jembia aruba... 'Shi' agi 'Ango' kodanga makümstsü...Tambuji tambu-sa asütsü aser tanübu-ji tanübu-sa asütsü. Iba yimli-jibo tashi-tawa, sangra-sangji, pura-poji o agi nempanga meyutettsü, saka alima yimya-liro (Nature) jagi ochi obendang agütsütsü.

Aor dak aketba tashimait kaji, tebou ka semchir adianu-aijanu tsüngda nunga, ni tuluba asütsü, ni temaba asütsü, ni takaba...ta takar shisangtepa aser kati ka nem yimli magütsütepa, kati ka jenjang raksatsütsü merangba, ibala shisatsü yabo endoktsüla. Ano tamang yimsu agizüka arogo tenzüka otsüren nunga ozü tamapur par tesupur...ta ken o bulutepa aser ashishitepa ya-a kanga tesasatsüka lir. Naga nung rongnung mezümpur tenuk lapoka nüji akümba kin-to tanübo kechi ka kuma aor akaaa...!!!...ta aiben kanga sasa-a bilemer. Yisu alima nung alidang pai sayuba nungi asenok atema-a tangazüktsü lesson aika lir... "Saka shibai ne tenibong tachiji nung madir, pa tsütsü külenjia tendakang" (Mathi-5:39). "Tesupur tama akümstsü aser tamapur tesu akümstsü" (Mathi-20:16). "Nenok rongnung shibai tuluba kümnur pa nenok tenzüker asütsü; aser nenok rongnung shibai temaba sunur pa nenok kilir asütsü" (Mathi-20:27). "Aser shibaisa pei sasa uludir pa tila akümstsü, aser shibaisa pei sasa tila kümdir pa ulutsü" (Mathi-23:12). Asenok Khristan-tem ya kodak senso akümstsüba amangertem lir, anungji alima nung tenuki anguba arogo senso nung tamapur asütsüba dang nungibo, kodak senso nung mezümpur asütsü toktepa amangtsüla. Anungji Tsüngrem lartem/laishirtem-ia arogopur dang kodak senso nung tamapur asütsü raktepa amangtsü indangang sayutsüla, saka alima konang-nungang bushitepa ozü tama/par tesu ta raktepsüba-bo mesayutsüla. Tsüngrem o-i ashir... "Saka asen senso kodak nung lir, aser ano idaknungji kümtetdakba ka, oda Kibuba Yisu Khrista asoshi asenoki atar" (Filipi-3:20). Atangji, asenok amangba ya kodak senso atema amanger...Kechiba asenok alima nung toktsür aotsüba arogo senso nung tamapur/tesupur...ta ken o bulutepa/ashishitepa alitsü...!!!???

Otsüla-oboula nungeri takzü-takponga jembia aruba agi, lipoklisang nung aibelenerbo azükaro masür aser tia makar karbo arishia leptoker aser chirnur/semchisemnur watsü-wabong tajung mesoteter ta takzü-takponga aru aser iba amaji shitak atalok. Anungji Aor senso ajungai kanga junga angatettsübjai...Oboula Tongpok dak jakzüker kidong kongsang kwika razüka odir ajakji adianu, aser ano iba küsaji...Oboula Longpok o Longjakrep na dak nungi jakzüka kidong kongsang kwika razüka odir, parnoka ajakji adianu... ta iba tangatetba nungji kati ka den meimtepa, akümstsübutepa, keta-sentepa alitsüla. Aji oda, Ao kini Yisu yimsu agizüka pa jilo ajizüker kin ka ama, ibala tangatetba nungji litetra, Ao kin telongjem tali ahangshitsü aser temeimtep tali adoktsü, aser idangji memeteti Ao kin tejakleni aotsü. Anungji asen Aor yimkü yimli, lipoklisang, kin-kidong jakzüka aruba, tamang yimsu agizüka arogo tenzüka...itemla nung, ozü tamapur, ozü mezümpur, onok tuluba, ner tilaba...ta toktepa otsüren bushitepa kakat zülutepa ya joko anendi...Asenok tamajung nung toktepa alitsü melena, mapa tajung nung toktepsü tenzüki aser tang nungi kati ka den meimtepa aser longjema alitsü tenzüki. Jokorla, kin-kidong jurila otsü zülutepa ya anendi aser Aor ajak adianua...ta dang sur meimtepa alitsü tenzüki. Tsüngrem o-i ashir... "Tatem maka kin kidong otsü koba agi Tsüngrem tamang nung aliba tenzüka melena rarabangsentepang adokdaksür, item nung parnoki temulong madentsü melaang" (1 Timoti-1:4). Arung asenok ozü mezümpur aser ozü tuluba ta toktepa melili, saka kati ka nem yimli agütsütepa alitsü tenzüki.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agütsü mepishir**



## ADF International-i Egypt nung Khristan ana chioktsü akhanger



Abdulbaqi Saeed Abdo aser Nour Girgis

**June 06, 2024:** Tamangba yimsü temeden atema inyakteremi Egypt sorkar dang Khristan ana- Nour Girgis aser Abdulbaqi Saeed Abdo na tepuokdak nungi chiokang, ta akhanger.

Islam yimsü toktsür Khristan yimsü agizükertem yaritsü atema lapokba Facebook Group ka nung tenati shilem agiba atema 2021 küm tena apu aser tepuokdak nungi tang tashi mechioker.

Egypt nung sorkar ketdangsertemi, Khristan ana jagi kiralongra mapatem nung shilem agi, ta tena nem tai tonglokja liasü.

2021 küm November ita nung police-i pharmaceutical company ka nung inyaker Khristan, Nour Girgis jaoka liasü, ta legal advocacy group ADF International-i sangdong ka nung metetdaksü.

Asüngdangyatsü atema police-i Girgis jaok, ajisüaka anogo 40 tashi pua ayu. Iba sülen maneni pa Terrorism Unit kati anir ao.

Girgis-i Facebook group "Al Abareen," nung shilem agi aser Islam yimsü anema Tsüngrem mezüngmeshi, ta pa nem tai tonglokja liasü.

Girgis anema court nung ken

o mangadang ajisüaka pa dang maneni asüngdangyar, mezüngmeshir aser reshikangshir, ta ADF International indang Global Religious Freedom team nungi Elizabeth Francis-i metetdaksü.

Ano külen 2021 küm December ita nung ketdangsertemi Abdulbaqi Saeed Abdo-a apu. Kasa Facebook group nungji Saeed-ia shilem agi aser yimjak nung sayutsüngi, ta aija pa apu.

Saeed ya Yemen nungi lir. Pa tepuokdak balala nung belenshia ayur aser pa temang nung timtem aika adokogo.

Khristan anaprongla anema court nung ken o tang tashi mangadangi ken o angadangsü atema mapang tatsülang dang atsülanger, ibayongji ADF International-i International sabang nung tena atema ola adoka inyaksüsa aküm.

ADF International-i United Nations Working Group on Arbitrary Detention nem iba osang metetdakja, 'Egypt ketdangsertemi yimsü temeden anema inyakba den court nung ken o jembiba tsütsü International ozüng alema inyakogo' ta metetdaksü.

ADF International nung advocacy for Global Religious

Freedom director, Kelsey Zorzi-i, "Yimsü temeden, pei tebilemba jembiba temeden aser ken o akatsü temeden ajakji international ozüng nung lir, ajisüaka Egypt ketdangsertemi item temeden ajak anema Khristan ana tang tashi tepuokdak ayur," ta metetdaksü.

Taoba mapang U.S. Senator aser International Religious Freedom nung Ambassador-at-Large, Samuel Brownback-ia, "Yimsü temeden ya meimchir ka temeden lir, anungji iba temeden ya wazüka ayutsüla. Egypt nung tebur ana dak atalokba ya agizükettetsü makok, aser iba ya tena indang yimsü temeden alema inyakba lir," ta metetdaksü.

Egypt nung Khristantem ya 'second-class' sensotem ama züngshir. Egypt sorkari tema nungbo Khristantem pusema jembir, ajisüaka Khristantem kümzüktsü atema ketdangsertemi ozüng tesashi mebenoker.

Iba linük nung Tenla kitem tasen asütsü atema Arogotem nem temelaba magütsür aser temeim mapa inyaksü atema Khristan melungtet teloktem nem temelaba magütsür.

## Arkansas nung lenmang nung sayutsüngia jajar ka dak injang khaloktsü

**June 06, 2024:** Amongnü 15 jungnüa JFK Boulevard aser McCain Boulevard lenmang nung sayutsüngia arur.

Taoba Amongnüa Walker-i lenmang nung senzürtem matsüngdang sayutsüngiba mapang nung arrshi küm 20, Latarryes Bush-i pa dak injang khalokja liasü.

Rev. Walker-i tesüiba küm

15 jungnüa JFK Boulevard aser McCain Boulevard lenmang nung sayutsüngia arur.

Taoba Amongnüa Walker-i lenmang nung senzürtem matsüngdang sayutsüngiba mapang nung arrshi küm 20, Latarryes Bush-i pa dak injang khalokja liasü.

Rev. Walker-i iba lenmang dang ya "Red Light Green Light Church" ta ajar.

Rev. Walker-i, "Ni sayutsüngiba mapang nung Bush aru aser kü ket nungi microphone meshi saka ni magütsüba agi pai kü dak teboklang nung injang khaloktsü. Ajisüaka

idangyongjisa pa tejak nung tesasabaji ni reprangteta liasü," ta metetdaksü.

Iba tatalokba sülen Police-i Bush pua anir ao aser tang Pulaski County Regional Detention Facility nung puoka lir.

Osangbener den jembidang Walker-i, "Iba tatalokba ya kü mission mapa den sendaktepa lir. Kü nükjidongji nisungtem Tsüngrem tsüngdangi anasa arudaksütsü atema lir. Anogo shia, aonung shia, minute shia aser second shia tanela ka Tsüngrem dangi anir arutsüji kü nükjidong lir," ta ashi.

Walker-isa, pai maneni Khrista osangtajung lemsateptsü, ta ashi.

## ANOGO ABEN TSÜNGREM DEN

### Temeim aliba lokti nungdaker

"Nenoki medemer o medemer na meimtepra, ajangla iba jagi nenok kü nütsüng ta ajaki metettsü"

(Yn. 13: 35).

Asenok telungjem nung, tesayuba nung merüka ayutsü aser tenzükba nung tenendak alitsü jembir. Saka temeim kong ali ? Telemsatep maliba lokti tentet ka tanü asenok asoshi nungdaker.

Efesa arogoi tesayuba nung akanga aser tenzükba nung mazüngi liaka Khristan asoshi tekümdangtsü iba arogo nem agutsü. Kechiaser tamangertemi mezüng temeim toktsü. Parnoki temulung memeyipra iba yimti nungi arogoji samadaksütsü tashi tekümdangtsü agütsü. (J. Adok 2:1-5). Tanü asen arogo Efesa arogo den kecha balaka masü. Ajak kar, saka temeim nungdaker. Asenok külemi sentepba nükjidongji temeim jangrudaksütsüba aser mapa tajung inyaksüba (Ibri 10: 24, 25). Meimteptsüba tetenzük nungi Tsüngremi asenok nem agütsüba osang (1 Yn. 3:11; 2 Yn 5). Asenoki tatok agütsüteptsüla, khu benteptsüla, ajungshiteptsüla, agizükteptsüla aser kati ka asoshi sarasademtsütsüla.

Mapa agi asenoki temeim sayudaksüba lenmang kaji asenok akaba rongsen agi nungdakba pur yaritsüla (T.M. 2:44-45). Temeim agi sünga aliba arogo kaji metsü ama aser milen ama tesangwa lir. Yamaji asenok dak metsü tanang ketdaksütsüla aser tenem kolak nung tesangwa ka ama asütsüla.

## Chhattisgarh nung yimdaklirtemi Khristan kibong 15 sendoker



Rev. Larry O'Neal Walker

**June 06, 2024:** Chhattisgarh nung Bastar district kübok yimtsüng ka nung yimdaklirtemi Khristan kibong 15 sendokba sülen ita asem jungnüa arudang Khristantemji kanga timtemdar, ta International Christian Concern (ICC)-i metetdaksü.

Khristan 15-i sign süa shidi ka police nem agütsüogo.

Iba shidi nungji Khristantem police tongti ketdangser dang, Naspal yimdak Gram Panchayat (village council)-i Khristantem dang Khristan yimsü tokjang, mesüra yimdak loktiliba-rongsenkettzüng tsütsü nenok sendoktsü, ta aiben amokmerena liasü, ta metetdaksü.

Khristantemisa police dang, Gram Panchayat-i yimdak Khristantem nem tziü tajemtsü magütsür, dokan nung meshishidaksür aser mapa meinyakdaksür, aser iba ya yimdak nungi Khristantem aridokba sülen Khristantem meyong kiset shiruru aser kiojen agiadoktsü nükjidong nung lir, ta metetdaksü.

Chhattisgarh nung district balala kübok yimtsüng aika nung tribal Khristantem nem

temeden aika magütsür aser amokmerener.

Shidakba agibo Village council (Gram Panchayats)-i yimdaklir ajak temeden kümzüktsüla ajisüaka parnoki Khristantem amokmerener, ta Khristantem metetdaksü.

Bastar district ya tribal nütsüng teimba aliba area ka lir; iba district kübok yimtsüng noklang aika lir, aser nüburtem dangji 'Adivasis' (chichiba lisopurtem) ta ajar. Adivasis aikati Yisu Khrista agizükogo.

Naspal yimdakji village council-i, Khristantem nem kisüjensüba mapa meinyakdaksütsü, ali ayoktsü mesüra alizüktsü memelatsü mesüra taküm alitsü atema mapa kecha meinyakdaksütsü aser alu nunga mapa meinyakdaksütsü atema bangjema liasü.

Ano yimdakji kari dangi item Khristantem denji o jembira aibelenertem dang anogo asemnü taa senchi achitsü, ta council-i metetdaksü.

Village council-isa yimdak Khristantem leper liaka Khristantem tasümgang meremdaksütsü telemtetba agiogo.



AO OSHI ANGAZÜKDAK: TANÜ ANGAZÜKTSÜBA OJANG



Süshi

(v) tsüngsang junga aküm, timtem süia ao (disappearance of cloud / cease of trouble)

\* Anüngdang mepet süshiba den külemi pa temang nung timtem aliba dena süshia ao.

Süshi

(v) mekoksumonga bener aru (bring heavy object with difficulty)

\* Makokbai pa khu makok-makok süshia bener aru.

OLONG PAITEP # 6811

Grid for crossword puzzle #6811 with numbered squares.

TIPIEN

- 2. Auo nung chiyongtsü asenba
5. Mangyimba mapang
7. O tamendakdak
8. Pei dak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A \_ \_ \_ g
6. Mopung apodoka
9. Tongtipang tagitsü
10. Menungra bilem
11. Aiür
13. S \_ \_ \_ k
14. T \_ \_ \_ r

OLONG PAITEP # 6810 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tassen, 13. Lemjem,
15. Tambu, 16. Khuret,
17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.



LILI - YA KECHI HAYANGER YA?

Kinungbo - Hai pastorba ozü tetsüya tana tanur tangloker amai ja ya.

Pastor - Ya-a adianu nabo kinungtsü tanur tanglok nung yamaji shisa bulur no?

Kinungbo - Haito ozü tamalen 1999 küm tebur ka aso. Saka tia maka 2004 küm asü aja. Aji agi tan ya-a tia makatsü asü ta shisabulur aja.

Pastor - Kua aji jabaso ji sür küm ummm 20 ajangerana...

Kinungbo - Haito yamaji ati aji.

Pastor - Ni sarasademtsüdi no.

Kinungbo - Pastorba ato ozüto tebur chanu tajung ka soa lir. Ano sarasademjang nuu.

Pastor - Sarasademdi Oh! Tsüngrem nai ozü sarasadem langzü nung pelar. Iba jabaso yabo nai arishi talang moajangma, Amen.

Nagaland nübur - Aji Tsüngrem tamangertem sarasademba osang tajung lir. Kechiaser Nagaland for Christ.

Lilir : N.Saku Imsong, 4th Mile Chümoukedima

Assam: Sen crore 8 alang Yaba tablets KA nung apu

Guwahati Aami/June 6 (Agencies): Sen crore 8 alang Yaba tablets meyrejang 40, Bresthibarnü Assam kübok Karbi Anglong nung puogo.

Sources temi ashiba agi, osang tejangja angazükba sülen police temi Bokajan, Karbi Anglong kübok Dillai Point nung temulung melemi bilemba gari ka sota liasü.

Gari sota bushisüngdangba mapang police tem engine bay nung takdang talila ka yangluloker aliba nguteta liasü.

Iba takdang maneni bushisüngdangba mapang police temi Yaba tablets aika bener aliba ngutet.

Police-i ashiba agi, iba temesepba mozü ya local grey market nung sen crore 8 dak tema alang asütsü.

Temesepba mozü ngutetba dak sendakba nung temulung melemi bilemer ana puogo.

Maneni temesepba mozü ya kolen nungi bener aru aji jangjatsü atema bushisüngdang tenzüko, ta police temisa metetdaksü.

Assam nung BJP lenirtemi Gaurav nem tenüngsang agütsü



Gaurav Gogoi

Guwahati, Aami/June 6 (Agencies): Party balala süaka taoba Assam BJP tir aser MLA Siddhartha Bhattacharya-i, Congress lenir Gaurav Gogoi nem Jorhat nungi Lok Sabha election nung takok tajung anguba atema tenüngsang agütsüo.

Bhattacharya-i, Gaurav Gogoi dak sempet tajung aliba atema tenüngsang agütsü aser ashiba agi, iba takok ya Assam Congress lenir atema yimdenyimsüsüba nung pa indang career asoshi tongtibang alizüng ka tongtetba lir.

Osangbenertem den sensaksemba mapang Assam BJP MLA Siddhartha Bhattacharya-i, "Ken o asadanga aser Jorhat nung metetepa alirtemi osang

SANGDONGER Mrs. Temjenkokla D/o Mr. Aotemsu Chuchuyimpang aser Mr. Putuwati S/o Lt. Lipokyanger Chuchuyimpang kibong kümer lia arur, dated 18-05-2024, anogo nung teti asoshi balaogo. Anungji, Mr. Putuwati kuli (sign) meli kija/lokti kar-i Mrs. Temjenkokla nem sen apuja lira ibaji Mr. Putuwati aser kinungertemi memetetta iba osang ajanga nuburtem dang sangdonger. Sd/- Mr. Putuwati Chuchuyimpang

NPP-i aniba MDA sorkari küm 5 term tembanga inyaksü: Conrad

Shillong, Aami/June 6 (Agencies): Meghalaya chief minister Conrad Sangma-i, Lok Sabha election nung tamakok nguaka NPP-i aniba Meghalaya Democratic Alliance (MDA) sorkari state nung küm pongu term tembanga inyaksü ta temulung lema bilemba lemsatopogo.

Lok Sabha election nung tamakok anguba sülen Meghalaya CM Conrad Sangma shiba NPP national tekolakba aser MDA mendenbuba lir, pai tensa asadangsü atema parnok den longiemer aliba party senden ka ayongzüko.

Osangbenertem den sensaksemba mapang Meghalaya CM Conrad Sangma-i ashiba agi, inyakyim balala ajanga NPP puri tawa agiba Lok Sabha election nung takok mongutet.

Pai, "inyakyim dak sendakba

nung jembia atatsü karara, saka kuli balala aika lir aser iba indang sensak asemtsü atema onok senden anabenbo menatokogo," ta ashi.

Maneni Meghalaya CM Conrad Sangma-isa, Shillong nung Voice of the People Party's (VPP) puri takok anguba ya parnoki ochi mashi inyakyim ajanga nokdakba ajanga lir, ta ashiba den MDA sorkar anema ochi mashi ken o benokba ya kuli kecha mali, ta shisem.

"Yimsüsüba nung onoki ochishia inyaker. Onok atema meimshitsü kecha mali aser ajaki odangtetsüsa jangja jangja inyaksü asoshi onok bendanga agütsür lir," ta Meghalaya CM-i ashi.

VPP-i MDA sorkar atsüngingsü atema ayongzüko dak sendakba nung Sangma-i, sorkar ya assembly election mapang nüburtemi shimba lir, ta ashi.

Gogoi nem tenüngsang agütsüo.

Saikia-i, "takok tajung ngutetba atema Gaurav Gogoi nem tenüngsang agütsür. Iba takok ya Jorhat asoshi lenmang aika nung kanga tongtibang lir. Iba ajanga sen, publicity tulu, lenir aika adenshiba aser o ajang ajanga jembiba ajanga election akoktsü atema tetibo teyari magütsür ta kuli agütsüo," ta ashi.

Ajisüaka Saikia-i Gogoi nem tenüngsang agütsüba atema Assam chief minister Himanta Biswa Sarma-i pa aitsüo aser ashiba agi, Saikia yakta Congress-i aotsü akok.

"Mrinal Saikia-i Narendra Modi nem tenüngsang magütsü, saka pai opposition party nungi takok angur Gaurav Gogoi nem tenüngsang agütsüo. Iba inyakyim ajanga pa mapang talangkabo BJP züngsem ama malitsü ta amanger," ta Assam chief minister-i ashi.

Assam chief minister Himanta Biswa Sarma-i anir BJP puri Jorhat nung takok angutsü merangkaka Congress lenir Gaurav Gogoi-i takok ngutetogo.

Gaurav Gogoi atsüngtoktsü atema BJP-i mapang aser tashi aika intokogo, ajisüaka takok mongutet.



# Israel-i Gaza school nung bomb pokloktsü, nisung 40 shi asü

**Gaza City, Aami/June 06 (Agencies):** Israel mitkari central Gaza nung United Nations den sendaktepa aliba school ka nung bomb pokloktsü, kong Palestine nunger tesem balala nungi arua jenoka liasü, aser iba mapang nisung 40 shi asü aser 70 dak tema yiru.

Gaza indang sorkar media office aser Health Ministry ketdangsür temi iba tesem nung nisung asüba ya jangjatsüogo, kong tanur 14 aser tetsür 9 dena lir. Brehostibarnep Israel-i al-Sardi school aser Nuseirat camp nung nisung aliba ki kar amakba sülen iba osang ya sangdonga liasü.

Gaza Strip nung yimsü asüba Hamas teloki Brehostibarnü amakba ya aitsü aser "horrible massacre" lir ta ashi aser iba lendong nung asüba aser yiruba rongnung tetsür aser tanur aika lir ta shia liasü.

Al-Sardi school nungya Palestine nunger rara mechi pei ki yutsür jena aor nisung meyririjang aika jenoka liasü, koba UN agency for Palestinian refugees (UNRWA) den sendaktepa liasü ta Palestinian Wafa news agency ajanga ashi.

Nisung tasü mang aser yirur alir aika central Gaza nung aliba Al-Aqsa Hospital bushia anir arur aser yangji shirangertem asemben agi tali lir, ta Gaza indang government media office odongtar Ismail al-Thawabta-i ashi.

"Israel occupation ajanga

## West amaktsü Russia-i nok-nü agütsütsü akok: Putin

**Moscow, Aami/June 06 (Agencies):** Anüolen linüktem nung amaktsü nükjidong nung Moscow-i linük balala nem nok-nü agütsütsü akok, ta Russia Tir Vladimir Putin-i ashi.

West ajanga Ukraine nem long-range weapons tem agütsüba aija jembidang Putin-iba o ya ashi.

United States densema linük kari Ukraine dang Russia telung nung targets tem amaktsü temelaba agütsüogo.

Iba amala inyakyim yagi tebilemsü tulu adokdaksütsü, ta Putin-i bendanger osangbener dang ashi.

"Ozü litsü maka timtem adokdaksütsü asoshi rara dak tesem nung iba amala nok-nü agütsütsü takoktsü ta bilema alinung kodaser onoki kasa nok-nü ya item linük nung tongtipang tesemtem amaktsü asoshi magütsütetsü?" ta Russia tiri ashi.

"Telangzüba kasa masütsü. Iba atema onoki shisadangtsü." Ajsüaka Moscow-i koba linük nung item nok-nü agütsütsü bilema ali, iba indangbo pai mashi.

(Maneni tapak 8 nung...)

tetsübotsüka nisung aika UNRWA school ka telung nung tepsetba ya parnoki kin ajunga Hamas compound amak ta ashi. samatsütsü merangba kuli Ozü sepaitem anema amaktsü tejangja lir," ta pai osangbener sentong yanglua aliba dang ashi. kiralongrar tem samatsüogo ta ashi.

Israel mitkaria bomb Hamas-i Israel sangdong ya pokloktsüba ya jangjatsüogo aser par indang fighter jets magizüker. aser Nuseirat tesem nung (Maneni tapak 8 nung...)

### TEPELA OSANG LEMSATEPER

2024 Lok Sabha election nung S. Supongmeren Jamir-i otsü tasen ka yangluteta takok tulu ngutetba asoshi 25 Mongoya ACCC (Longsa Unit) ajanga Tsüngrem tenüng sanga pa nem konang tetushi agütsür.

Takok tulu ngutetba ya talisa Nagaland nung aliba nüburtemi tangatetba tajung nung nübu, rongsen, shisatsü den tamang sarasadem agi pei senti vote agütsüba ajanga lir, anungji, nübura ajak dang pelaba lemsateper.

Tsüngremi asen lenir S. Supongmeren Jamir MP wadang tasen inyakdang pa nem arishi talang den anema aliba aser terajem shisatsü moajang ta sarasademtsür.

Sd/-  
Sosanglemba  
President  
25 Mongoya ACCC  
(Longsa Unit)

Sd/-  
Rongsenmongba  
Secretary  
25 Mongoya ACCC  
(Longsa Unit)

### KOSASANGER PUSU MENDEN UNGMA IMLANG JANGJASHITSÜR

Jenangsanger Kosasanger Pusu Menden Ungma Imlang ajanga Mr. Onentiba Jamir Tatar den küm ter trok (16) tashi lia arudang pa dak apetasüng kecha maket ta yimdeni jangjashitsür.

Kosasanger Yimden tenüng nung

1) Temsüzenba Lkr, Tatar

2) Imlikokba Imsong, Tatar

K. Ali Imsong, Tatar  
Secretary

Jenangsanger Kosasanger  
Pusu Menden Ungma Imlang

### Office of the Longsa Village Council

Mokokchung-798601, Nagaland

### PELABA LEMSATEPER

18 Buba Indian Parliamentary General election nung tensa mapang den alimai yimli tulu agüja ozü Longsa Senso chanu, Shri. Supongmeren Jamir, Congress ticket nungi candidate ka ama tokteptsü maongka nguteta, electioneering mapa tenzüka aoba anogo nungi Naga senso ajaki yakpang süa pei nübu, shisatsü, taküm tenla aser rongsen jenti den amangbapur ajaki amang sangwa metitemi sarasadem nüktzü agi nungita yariba ajanga, tanü asangsang nung Indian Parliament menden nung Naga nunger meyonga mentettsüsa maongka agütsüba asoshi electorates ajak dang Longsa senso ajak tenüng nung Longsa Village Council ajanga kangasa pelara-ni ta tsüngdong arua nenok den ajurutepta den kasa iba sangdong ajanga lemsateper.

Nenok lokti balala aser kija kibong taküm ajak Kibuba Tsüngremi kechisarina ajak nung temoatsü südakjangni ta ozü senso sarasadem. Ano maneni Naga kin arok ajungtsü shisa tabensa den pei akokba agi maneni yaridaksüner.

Kanga pelar.

Sd/-  
Talichuba Tatar  
Chairman

Sd/-  
Opanglemba GB  
Secretary

### Office of the Longsa Yimsoshir Zünga

Mokokchung, Nagaland

### KHONANG TETUSHI

Wb. T. Imkongli Lkr aser Wt. P. Talipokla Jamir, tena jabaso Dr. Watitemjen Lkr, pai NPSC tatidang ajanga Assistant Professor in Botany, under Higher Education Nagaland, nung takok tulu nguteta khonang tetushi bener arutsü nung obala nunger Zünga ajak tenüng nung pelaba sangdonger.

Tsüngremi jabaso nübura tenzütsü asoshi anema aliba den arishi aser shisatsü maneni moajang ta onok tamang sarasadem.

Sd/-  
I.Limangangshi Jamir  
Convener


Sd/-  
L.Imtionen Pongen  
G/Secy.



## "CHIYONGTSÜ KUMZÜKA AYUTSÜJI AJAK MAPA."

### Food Safety:

#### CHIYONGTSÜ NUNGI ADOKBA TASHIDAK NUNGI KUMZÜKA ALITSÜ TONGTIPANG PONGU



#### Müreka Liang

- o Chiyongtsü mamshidang aser amshiba mapang teti teka shidokang
- o Metzü meshiba sülen teka shidokang
- o Chiyongtsü renemba mapang amshiba tesem aser osettsüset ajak shidokang
- o Sorochiokba tesem aser chiyongtsü tem shiruru nungi kumzüka yuang




#### Chiyongtsü Tazü aser Tamen balala amshiang

- o Shi tazü, poultry aser seafood danga chiyongtsü den balala yuang
- o Chiyongtsü tazü amshiba nung kotari aser cutting boards ama osettsüset balala amshiang
- o Chiyongtsü tazü aser tamen container balala nung yuang



#### Mena soang

- o Chiyongtsü, talisa shi, poultry, entzü aser seafood kanga junga soang
- o Soup aser stews ama chiyongtsü 60°C matong tashi metang
- o Shi aser poultry asodang tzu ya sentsü mesüngtua merem mesüi mürek-müreka makum tashi soang.
- o Mena sor aliba chiyongtsü kanga junga tonglemshiang



#### Chiyongtsü Temperatures shidak nung yuang

- \* Mena sor aliba chiyongtsü room temperature nung ghonda 2 dak tali mayutsüla
- \* Mena sor aliba aser shisa aoba chiyongtsütem refrigerate süang (5°C dang tajemba)
- \* Mena sor aliba chiyongtsü machidang kanga junga tonglemshiang (60°C dak tema)
- \* Refrigerator nung süaka chiyongtsü tali talangka teyu
- \* Rer kumer aliba chiyongtsü room temperature nung yimsa teyok



#### Tzü tajung aser Raw Materials amshiang

- \* Tzü tajung amshiang mesüra tajung kumdakjang.
- \* Chiyongtsü tajem aser tasen shimang.
- \* Pasteurized milk ama processed sür aliba chiyongtsütem shimang.
- \* Süngjang-lijang aser aonsotsütem, talisa tazü achitsü atema shidokang.
- \* Chiyongtsü expiry date / Best before date alemer tamshi.
- \* First In First Out (FIFO) rule sülen anidakang.

#### Kechiba?

Microorganisms timbai tashidak madokdaksür, lendong aketba microorganisms ya ali, tzu, shiruru aser nisung dak bolua angur. Item microorganisms ya teka, asentzü aiba sü aser osettsüset, talisa cutting boards nung alir aser tera dang kongshiba ajanga chiyongtsü nung atemtsü aser chiyongtsü nungi adokba tashidak adokdaksütsü.

#### Kechiba?

Chiyongtsü tazü, talisa shi, poultry aser seafood aser parnok indang tzu nung microorganisms tamajung alitsü, koba chiyongtsü renemba aser rizünga ayuba mapang danga chiyongtsü dak belenoktsü.

#### Kechiba?

Junga asoba ajanga lendong aketba microorganisms ajanga amai tepseter. Chiyongtsü temperature 60°C tashinung asoba ajanga achitsü junger ta study balala nung sayuogo. Minced meat, rolled roasts, large joints aser shi temang rangben amala nung temlung tali agütsütsüla.

#### Kechiba?

Chiyongtsü tem room temperature nung yura microorganisms kanga kera bendenloka aor. Temperature 5°C tsünglanglen mesüra 60°C tekalen ayuba ajanga microorganism ainba meilongi kumdaksür mesüra anendaksür. Lendong aketba microorganism karbo 5°C teküok nunga ainer.

#### Kechiba?

Tzü aser rer long densema raw materials nung lendong aketba microorganisms tamajung aser chemical meyoktepa alitsü akok. Miim aliba chemical ya chiyongtsü teraksa mesüra tamajung nung adoktsü akok. Raw materials shimba nung kanga kumdangang aser shidoka takep sadokba ajanga timtem ajemdaksütsü.

For any grievances mail us at : [foodsafetynagalandhelpline@gmail.com](mailto:foodsafetynagalandhelpline@gmail.com) or

Contact us: +91 6009970644

Time-11:00 a.m - 2:00 p.m TUESDAY & THURSDAY (on working days)

State Food Safety Authority.

Department of Health and Family Welfare, Govt. of Nagaland.



# Maddison aser Jones na England indang Euro team nungi aginogo



Curtis Jones

James Maddison

**Aami/June 6, 2024 (Agencies):** Euro 2024 atema England manager Gareth Southgate indang tatemangbuba team nung James Maddison aser Curtis Jones na mezüngoksemsü.

Tottenham nung playmaker Maddison aser Liverpool midfielder Jones na mezüng asayar 33 shimba nung densema liasü.

Aayar 33 rongnungi asayar tenet agina Germany nung asayatsü aliba asayamung atema asayar 26 shimtsü aliba

nung Liverpool centre-back Jarell Quansah-a densemsü kangabo timla mali.

England team Hombarnü St James' Park nung Bosnia-Herzegovina goal 3-0 agi akokba friendly asaya nung Maddison substitute ama asayaogo, ajisiüaka Jones aser Quansah nabo masaya.

Football Association-i ashiba agi, Hokolbarnü Wembley nung Iceland den tatemangbuba warm-up friendly asayatsü lia Jones aser Maddison na England camp toktsürogo.

"Pre-tournament atema renemshiba mapang tenati tongtibang shilem agiba atema kanga pelar," ta FA-i ashi.

Taoba mapang Leicester nungi asayar Maddison ya England team nungi tenetben asayaogo aser pa 2022 World Cup atema England team nunga densema liasü, ajisiüaka pa Qatar nung khen danga masaya.

Arishi küm 27 tain asayar ya Tottenham nung pound million 40 yong aden saka pa yiruba ajanga season tetenzüklen dak alaka junga masayatet.

Asayartem rongnung Manchester United left-back Luke Shaw bo mesentok, shiba yirur mapang talangka masayai lir Bodhbarnü training atema meyipa aruogo.

Real Madrid midfielder Jude Bellingham team nung Honibarnü adentsü. Pai Real nungi June 1 nü Champions League final kokogo.

England team Euro nung mezüngbuba asaya Serbia den June 16 nü Gelsenkirchen nung asayatsü. Iba sülen June 20 nü Denmark den aser June 25 nü Slovenia den asayatsü.

# India nunger para-shuttlers 13 Paris Paralympics atema qualify süogo

**Aami/June 6, 2024 (Agencies):** Taoba Paralympics nung gold medal ngur alisang Krishna Nagar densema India nunger Indian para-shuttlers 13 taruba Paris Paralympics atema qualify süogo, ta Badminton World Federation (BWF)-i metetdaksüogo.

Item asayartem ya India tenüng nung badminton event teku tashi nung shilem agitsü, koba August 28 nungi September 8 tashi asayatsü renema lir.

2021 Tokyo Paralympics tebur kija asaya nung Nagar-i SH6 category nung gold medal nguogo aser taküma iba asaya akoktsü atema pa rangloker renemdar. Suhas Lalinakere Yathiraj aser Manoj Sarkar natia Tokyo nung silver aser bronze medal nguogo aser tenata tebur SL4 aser SL3 category nung takok angutsü merangtsü.

Ajak senteper National

Paralympic Committees 31 nungi tetsür 60 aser tebur 60 ta para badminton asayar 120 Paris Paralympic Games atema qualify süogo. Parnok asaya 16 nung tokteptsü, kong kija asaya 12 aser tarep asaya pezü densema lir, ta BWF-isa metetdaksü.

Taküm Paris Paralympics nung Women's Singles Standing Lower 3 (WS SL3), Women's Singles Short Stature 6 (WS SH6), aser Mixed Doubles Short Stature 6 (XD SH6) ta asaya tasen asem benoka asayatsü.

Iba den bendenloksema Austria, Belgium, Chile, Italy, New Zealand, Nigeria, aser USA nungi taküm mezüngbuba Paralympic badminton nung shilem agitsü lir.

Para badminton tetoktepbpa ya Porte de La Chapelle Arena nung August 29 nungi September 2 nü tashi asayatsü.

Paris Olympics atema qualify asüba India nunger asayartem:

Men's singles SH6: Krishna Nagar; Sivarajan Solaimalai

Men's singles SL3: Kumar Nitesh; Manoj Sarkar

Women's singles SL3: Manasi Girishchandra Joshi; Mandeep Kaur

Men's singles SL4: Suhas Lalinakere Yathiraj; Sukant Kadam; Tarun

Women's singles SL4: Palak Kohli

Women's singles SU5: Thulasimathi Murugesan; Manisha Ramadass

Women's singles SH6: Nithya Sre Sumathy Sivan

Mixed Doubles SL3-SU5: Kumar Nitesh and Thulasimathi Murugesan; Suhas Lalinakere Yathiraj and Palak Kohli

Mixed Doubles SH6: Sivarajan Solaimalai and Nithya Sre Sumathy Sivan.

# Novak Djokovic temekok surgery agiogo

**Aami/June 6, 2024 (Agencies):** Teburtem rongnung world number one tennis asayar Novak Djokovic-i Brestostibarnü sangdong ka ajanga pa temekok surgery agiba sangdongogo.

Tang asaya aliba French Open nung round pezübuba nung Francisco Cerundolo akokba asaya nung pa yiruba ajanga masayatetsüsa aküm aser tang surgery agiba indang osang metetdaksüogo.

Djokovic yiruba ajanga pa Grand Slam 25buba akoktsü meranga asaya aliba nung tetsükdaksü adokdaksüba dang masü saka pa Wimbledon aser Olympics na nung

asayatetsü masayatetsü mejangjai kümogo. Yiru masayatetsüsa akümba sülen ano Hombarnü rankings sayaba mapang Italy nunger asayar Jannik Sinner-i pa ajateta temaba jenjangi atutsü.

French Open-i sangdong ka ajanga, MRI result ajanga Djokovic medial meniscus shisaba jangjaogo aser iba ajanga pai surgery agitsü atema telemtetba agitsüsa aküm, ta ashi. "Ni tatemangbuba asaya nung meniscus yiruba sülen ni telemtetba tasak kar agitsüsa aküm. Ni tang tashi mangateter saka surgery takok ngua agiogo ta metetdaksür," ta Djokovic-i Instagram nung post ka ajanga

lemsatetp.

Wimbledon, koba Djokovic-i tenetben koker lir, iba asayamung ya July 1 nungi 14 tashi asayatsü aser Paris Olympics nung tebur kija asaya tennis asayamung ya July 27 nungi 4 tashi asayatsü renema lir.

Arishi küm 37 tain asayar yagi taoba küm Grand Slam pezü nungi asembo kokogo, ajisiüaka takümbo junga masayateti arudar aser tang yiruba ajanga pa jenjang tamajungba kümdaksüogo. Djokovic-i 2024 küm tang tashi nung asayamung ka danga koka mali aser January ita Australia Open asaya nunga pa Jannik Sinner-i tsükdakja liasü.

## BENDANGLI OSANG : Tapak 7 nungi...

### Israel-i Gaza school nung bomb...

"Tesem balala nungi jenoka aliba tesemtem nung mapa tamajung inyakba metentsü asoshi parnoki tiazü otsü ashir," ta al-Thawabta-i osangbener dang ashi.

United States aser danga linük temi ceasefire atema maneni meranga jembiaaka Israel sepaitemi asendenshir Gaza nung bomb pokloksüba mapang al-Sardi nung kongshi.

Nuseirat nung mamakdang Israel sepaitemi tesüiba ghonda 24 tsüngta nisung 102 tepseter liasü, ta central Gaza nung aliba Deir el-Balah nungi osangbener kati ashi. Parnoki central Gaza kübok Bureij aser Maghazi refugee camp tem nunga maka liasü.

Doctors Without Borders ajanga Bodhbarnü sangdong ka nung Gaza nung tensa ya "apocalyptic" lir ta shia liasü. Mongulbarnü nungi tenzüka Al-Aqsa Hospital nung nisung tasü mang 70 aser yirur alir nisung 300 dak tema lir aser asü-amartem ya timba tetsür aser tanurtem lir ta parnoki ashi.

Gaza Strip tesem ajungalen tesüngmangtsüka azüdokshiba aser Rafah border crossing shibangba ajanga health system laotsü jenjang tongogo, ta lai ashi. Rafah border crossing shibangba ajanga Palestine nunger aliba tesemi humanitarian aid agütsüba timba anena lir.

"Nisungi yangluba iba lendong tulu ya tangsa

anentsüla," ta lai ashi.

Israel-i Gaza nung ita ti rara arudang Palestine nunger 36,586 tepsetogo aser 83,074 yiruja lir. Kin ajunga samatsütsü ta linük kar aser UN ketdangsur temi ashiba rara ya Hamas züngsem temi October 7, 2023 nü Israel litsü telungi aita nisung 1,139 tepseter ano aika pua baner aoba sülen tenzü.

Ajisüaka iba rara tembangtsü asoshi meranga inyakba nung terenlok kangabo mali.

Taoba hopta US Tir Joe Biden-i rara anena atatsü asoshi phase asem sentong benokba jembitsü atema CIA director William Burns ya Bodhbarnü Qatar yimtiba Doha tonga liasü. Phase mezüngbuba nung hopta trok ceasefire alitsü aser iba mapang Hamas teloki pua alir kar chioktsü aser Israel sepaitem Gaza nung nisung aika aliba tesemtem nungi ainshitsü aser teti atema rara anena atatsü asoshi maneni jembishinütsü.

Region aser international jenjang nung tashi tait linük temi iba sentong ya bhukumer, saka Hamas-i teti atema ceasefire aser Israel sepaitem ajunga ainshitsü akhanger.

Ajisüaka Israel-i item takhangba magizüker aser Hamas madak takok mangu tashi khen atema rara anena atatsü asoshi dang jembitsü renema lir ta ashir.

### West amaktsü Russia-i nok-nü...

Putin-i Germany tenüng tuteta ashi, shirnoki tawa Ukraine dang Germany-i yangluba long-range weapons amshia Russia linük telung nung maktetsü ta shia liasü.

"Russian litsü telungzük nung targets tem amaktsü asoshi missiles tali yoktsü ta parnoki ashiba ajanga Russian-German tesendaktep raksatsüsa," ta Putin-i ashi.

US Tir Joe Biden-ia Ukraine dang America-i agütsüba nok-nü amshia Russia nung targets tem amaktsü temelaba agütsüogo, saka Kharkiv region anasa dang. Ukraine-i Russian litsü nung long-range ATACMS missiles mamshitetsü, ta White House-i ashi.

Tawa Ukraine-i Russia telung nung amaktsü atema US nok-nü amshiogo, ta US senator ka aser Western ketdangsur kati Bodhbarnü osangbener dang ashi.

Ukraine north-east tsütsü Kharkiv nung kanga sashia raratagi. Kharkiv ya Ukraine

indang yimti tulutiba jenjang tanabuba nung lir aser iba yimti ya arütsü nungi kilometre 30 (mile 18) dang pilar lir.

UK Foreign Secretary Lord Cameron-ia British nok-nü amshitsü atema telemtetba agitsü Ukraine dak keta lir aser Russian territory nung targets tem amaktsü temeden lir ta nenshia ashi.

Ukraine litsü telung nung North Korean missiles tem amshir ta Ukraine-i ashi aser Western intelligence agency temia Russia-i rara nung Iran-i yangluba drones amshir ta ashi.

Russia-i 2022 küm February ita nungi tashi ajak amshia Ukraine maka arur.

St Petersburg International Economic Forum nung osangbener den jembidang, Russia-i nuclear nok-nü kodanga mamshitsü ta West-i bilemba ya khenyongi tai lir, ta Putin-i ashi.

Ajisüaka Russia-i NATO linüktem amaktsü sentong lir ta jembiba yabo tai ta pai ashi.

## BILEMDANGANG

"Anema melira pongmangtem ajak amajok."